

## Il cavagl ed igl asen

In pur mava cun siu cavagl e siu asen a fiera. Omisdus purtavan ina pulita carga. Cura ch'ei han giu fatg in dètg tschancun dil viadi, ha igl asen sentiu ch'el vegneva pli e pli fleivels. „Ti eis bia pli gronds e ferms che jeu, mo tuttina havein nus la medema carga. Gida a purtar ina part da miu buordi, schiglioc mon jeu culs peis ensi!“, ha el supplicau il cavagl. Quel denton ha refusau criuamein da segidar cugl asen. „Jeu hai mez avunda cun mia carga!“

Malamein ei igl asen semudergiaus vinavon tochen ch'el ei daus per tiara.

Las stentas dil patrun da far levar si igl asen ein stadas adumbatten, quel era numnadamein stagn morts. Il patrun ha saviu far nuot auter che da metter la carga digl asen a dies al cavagl. Per silmeins saver spindrar enzatgei pauc dalla valeta digl asen, ha il patrun tratg giu la pial da quel. Aschia ha il cavagl era aunc stuii purtar il tgir digl asen.

Memia tard ei il cavagl s'enriclaus da sia criuadad. „Senza stenta“, selamenta el, „havess jeu saviu purtar ina part dil buordi digl asen ed aschia saviu spindrar sia veta. Ussa stoi jeu purtar tut persuls l'entira carga e suren aunc sia pial.“